

საკავშირო ჩემპიონატი ფეხბურთში დასასრულს უახლოვდება. უკვე ის პერიოდი დადგა, როცა გამოიკვეთა გათამაშების უმთავრესი ასპექტები. ცნობილი გახდა გუნდები, რომლებსაც კონკრეტული ამოცანებისთვის უწევთ ბრძოლა.

განვიხილო კვირას, 5 ოქტომბერს, უმაღლეს ლიგაში გაიმართა რამდენიმე მატჩი სწორედ იმ გუნდების მონაწილეობით, რომლებსაც ეს ამოცანები აქვთ დასახული. მათგან ერთ-ერთი უმთავრესი შედეგა კიევში ადგილობრივი და თბილისის „დინამოს“ გუნდებს შორის.

ერთ პერიოდში მსოფლიო ჩემპიონატის დამთავრების შემდეგ, კიეველთა პოტენციური მარაგი იმდენად მყარი იყო, რომ ამ გუნდის ჩემპიონობა ეჭვს არ იწვევდა, მით უმეტეს მას მერე, რაც კიეველებმა მეტად დიდმნიშვნელოვანი საერთაშორისო ტურნირები მოიგეს უცხოეთში. კიეველთა მეტად ძლიერი, სტაბილური შემადგენლობა, ტოლფასოვანი, შემსვლელი ფეხბურთელების სიუხვე საფუძველს გვაძლევდა გვეფიქრა ოქროს მედლების მომავალ მფლობელთა თითქმის უეჭველ ადრესატზე, მაგრამ სრულიად მოულოდნელად, კიეველებმა მარხიანად ჩაატარეს საკავშირო ჩემპიონატის რამდენიმე მატჩი. მათი ფეხბურთელები, თითქოს გადაღლილნი ჩანდნენ. გუნდს ხელახლა მოუხდა მთელი ძალების მობილიზება, რათა გათამაშების ფინიშზე კვლავ გაეძლიერებინა თამაში და ებრძოლა ჩემპიონის წოდებისთვის.

თბილისის დინამოელები, პირიქით, ჩემპიონატის დასაწყისსა და შუაგულში მეტად არასტაბილურად და, მთელ რიგ შემთხვევებში, ერთობ სუსტად თამაშობდნენ. გარკვეულ პერიოდში ჩვენს გუნდს მძიმე კრიზისის ნიშნები ეტყობოდა, მაგრამ, ჩვენდა სასიხარულოდ, იმ უმძიმესი ჩავარდნების პერიოდმა განვლო და თბილისელებმა თანდათან შესამჩნევად, საგრძნობლად მოუმატეს თამაშს, ოპტიმალური ძირითადი შემადგენლობაც დადგინდა, თამაშსაც სტაბილური ფორმები მიეცა და 5 ოქტომბრის მატჩისთვის თბილისისა და კიევის დინამოელები უმაღლესი ლიგის სატურნირო ცხრილის უახლოესი მეზობლები აღმოჩნდნენ. ასეთ ვითარებაში კიეველებთან შეხვედრას მეტად პრინციპული მნიშვნელობა მიეცა. ჯერ ერთი, ამ მატჩის წარმატებით ჩატარება დიდ პერსპექტივებს უსახავდა ჩვენს გუნდს. საკუთარ ძალებში რწმენას მატებდა თვით ფეხბურთელებს, მათს გულშემატკივრებსაც. კიევიდან წამოღებული ქულები ის სტიმული იყო, რომელიც ესოდენ გვჭირდება ჩვენი გუნდის ოპტიმისტური მხარდაჭერისთვის.

არის კიდევ ერთი „მცირე“ ფაქტორი, რომელიც თბილისის „დინამოს“ ყველა გულშემატკივარმა კარგად იცის და რომელიც ეს უკვე სამ ათეულ წელიწადზე მეტია, მოსვენებას არ გვაძლევს. თბილისის „დინამომ“ თავის თანაკლუბელებს კიევში უკანასკნელად მოუგო... 1953 წელს - 1:0 (ეს ბურთი მაშინ ა. ლოლობერიძემ გაიტანა კიეველთა კარში). მას შემდეგ კიევის „დინამო“ საბჭოთა ფეხბურთის აღიარებული და უპირველესი ფავორიტიც ყოფილა, უმძიმესი ჩავარდნების წლებიც ჰქონია, მაგრამ არ

იქნა და არა, თბილისელებმა კიევეში ჩემპიონატის ვერც ერთი მატჩი ვეღარ მოუგეს მასპინძლებს.

და აი, 1986 წლის 5 ოქტომბერი, კიევი, თბილისის „დინამომ“, ბოლოს და ბოლოს, კიევეში მოუგო ადგილობრივ დინამოელებს. ნავსი - ნავსად, ამ გამარჯვებამ კი, ჩვენი აზრით, დიდი ფსიქოლოგიური როლი უნდა ითამაშოს თბილისის „დინამოს“ წლევანდელ წარმატებაში, მით უფრო, რომ სადღეისოდ ჩვენმა გუნდმა მესამე ადგილზე ამოინია გათამაშების ცხრილში.

ეს მატჩი მეტად პრესტიჟული იყო არა მარტო თბილისელების, არამედ კიეველთათვისაც. ისინი ამ დღეს ძირითადი შემადგენლობით თამაშობდნენ, ყველა წამყვანი მოთამაშე მწყობრში ჰყავდათ. თამაშის მსვლელობის დროსაც ძალები არ დაუბოგავთ გამარჯვების მისაღწევად. კიეველთა პოზიციები ამ თამაშში კიდევ უფრო განმტკიცდა მაშინ, როცა ზავაროვმა თამაშის დასაწყისში თავით გაიტანა ბურთი სტუმრების კარში - 1:0.

თითქოს, ყველაფერი ბოლო წლების დაუნერგელი კანონის შესატყვისად უნდა წარმართულიყო, მაგრამ თბილისელებმა უკიდურესად დაძაბულ, მძაფრ ბრძოლაში არაფერი დაუთმეს მეტოქეს არც ერთ რგოლში, სათამაშო მინდვრის არც ერთ ნაწილში და ერთ-ერთ მომენტში, როცა ჩელებამ შორი მანძილიდან მოულოდნელად ძლიერად დაარტყა კარში, ვერც მცველებმა შეძლეს მისთვის ხელი შეეშალათ და ვერც მეკარე ჩანოვი მისწვდა ბურთს. ანგარიში გათანაბრდა - 1:1.

გავიდა მცირე დრო. თბილისელთა ცენტრალურმა თავდამსხმელმა ცაავამ მინდვრის სიღრმიდან მიიღო ზუსტი გადაცემა და ასევე მოულოდნელად, ასევე ძლიერად დაარტყა შორი მანძილიდან. ცაავას ეს გოლი ტყუპის ცალივით ჰგავდა ჩელებადისას. თბილისელები დაწინაურდნენ -2:1.

კიეველებმა მეორე ტაიმის დასაწყისიდანვე სცადეს ინიციატივის ხელში აღება, ფართო ფრონტით შეუტყეს, მაგრამ სტუმრებს უკან არ დაუხევიათ. თბილისელთა მცველები მოქმედებდნენ შეთანხმებულად, ზუსტად, ორგანიზებულად. მეკარე ბალაძემ დარწმუნებით, საიმედოდ ითამაშა, ნახევარმცველები ბევრს მოძრაობდნენ და წარმატებით ასრულებდნენ მთავარ ამოცანას - არ მიეცათ კიეველთათვის უპირატესობის ხელში ჩაგდების საშუალება. მასპინძელთა ყოველ შეტევას წამსვე მოსდევდა საპასუხო კონტრშეტევა. თავდასხმის ხაზზე თავიანთ პოზიციებს არ ტოვებდნენ ცაავა, ჩელებამ, რევიშვილი.

ერთ-ერთი ასეთი იერიშის დროს კიეველმა ბესონოვმა თავის საჯარიმო მოედანზე უხეშად წააქცია ცაავა. მსაჯმა უყოყმანოდ დანიშნა 11-მეტრიანი. თბილისელებმა დარტყმა ჩელებადის მიანდეს. მანაც უშეცდომოდ გაგზავნა ბურთი მიზანში - 3:1.

ეს უკვე გამარჯვების განაცხადი იყო. რამდენსაც არ ეცადნენ მასპინძლები თბილისელთ დაცვის რიგების დაძლევის, ეს ვერ შეძლეს. სტუმრებმა დამსახურებული, უდავო გამარჯვება მოიპოვეს კიევის რესპუბლიკური სტადიონის მინდორზე.

გამარჯვება მუდამ სასიხარულოა! მაგრამ, ვიმეორებთ, თბილისის „დინამოს“ გამარჯვებას კიევში ახლა გარკვეული ფსიქოლოგიური მნიშვნელობა ენიჭება. იმედია, ჩვენი გუნდი დარჩენილ მატჩებშიც ისეთივე სიძლიერით, ისეთივე მონდომებით ითამაშებს, როგორც 5 ოქტომბერს.

ამ მატჩში მეთოქეებმა ასეთი შემადგენლობით იბრძოლეს:

კიევი - ჩანოვი, ბესონოვი, ბელანოვი, კუზნეცოვი, დემიანენკო, რაცვი, იაკოვენკო, ბალი, ზავაროვი, ვეტუშენკო, ბლოხინი (მიხაილიჩენკო);

თბილისი -ბალაძე, კეტაშვილი, ჩივაძე, ჭეღია (ცვეიბა), გოგრიჯიანი, კაკილაშვილი, სვანაძე, სულაქველიძე, ცაავა, ჩელებაძე, რევიშვილი.

მსაჯი ი. საფჩენკო (მოსკოვი). გააფრთხილეს სულაქველიძე.

დუბლიორთა მატჩი მოიგეს კიეველებმა - 3:2.

ლელი 7.10.1987